



SAUNOAGA AUTU AFIGA SUI PALEMIA
HON. TUALA TEVAGA IOSEFO PONIFASIO
FONOTAGA A TUPULAGA TALAVOU NOLA
ASO TOFI, 18 IULAI 2024
MILLENNIA HOTEL, FALE SAMOA
9:30 I LE TAEAO

Susu lau Susuga i le Faafeagaiga, lau susuga Ma'auga Motu,
poo lau susuga foi i le Failautusi o Ekalesia So'ofa'atasi a Samoa,
Afio lau Afioga i le Hai Komesina o le Malo Ausetalia
Afifio Fa'auluuluga o Matagaluega ale Malo,
ma Fa'alapotopotoga Tuma'oti ma Pisinisi
Susu le Peresitene o le Komiti a Tupulaga o le Nuanua o le Alofa;
Ae tainane le mamalu o le auvala'aulia, fa'apea tupulaga talavou e i ai a'afiaga
tumau o le soifua, o 'auga o aute o lenei fa'amoemoe.

Fa'afetai i lau susuga i le ta'ita'i o le sauniga, lau susuga Rev. Ma'auga Motu. O
lea ua mae'a ona mua mea i Matautu Sa, ma toto le niu i lo tatou va tapuia ma le
Atua Silisili Ese, e pei ona saunoa i ai le susuga i le ta'ita'i o le sauniga. O le a to'a
pea ia la i tumu o mauga puao o fa'asuaga, ae 'oa'oa i Faleseu ma sa'o i ma'a o
malie, le paia maualuga ua aofaga potopoto i lenei taeao. Tau ia ina ou faatulou
atu i le paia o Samoa ua afifio ma tala mai 'aao i lenei taeao, tatou te molimauiina
fa'atasi le fa'amoemoe o nai alo ma fanau poo tupulaga talavou e i ai a'afiaga
tumau o lo latou soifuaga, e tusa ai ma lenei taeao.

Nu'unu'u atu ia faatini o tausala outou paia ma faiga Samoa, o le a lē
gafataulimaina i se faamatalaga, aua o paia o Samoa ua taoto a'o se alao'o.
Fa'amalo le fa'atoatoa, malo le lava papale, faafetai le faauta.

Ae aveia ia o a'u e fai ma sui o le afioga i le Tamaitai Palemia, le mamalu o le
Kapeneta ma Samoa atoa, ou te faia ai sina fa'amatalaga pu'upu'u, e tatala aloaia
ai le Fonotaga mo Tupulaga Talavou e i ai a'afiaga tumau o le soifua, i le autū e
faapea, **“Fa'aa'upegaina Tupulaga Talavou i Auala Fa'atekonolosi”**.

Na avea Samoa ma totino o le feagaiga fa'ava-o-malo mo tagata e iai a'afiaga tumau o le lalolagi i le 2016.

Ma o Vaega 4, 9, 19, 20 ma le 26 o le maliega leni, ua fa'amalosia ai atunu'uma o le lalolagi o lo'o avea ma pa'aga a le feagaiga ina ia:

- Fa'atino auala talafeagai uma e mautinoa ai le mafai e tagata e i ai a'afiaga tumau o le soifua, ona maua feso'otaiga fa'atekonolosi talafeagai uma i le tulaga tutusa ma isi;
- Fa'amautinoa le agava'a tutusa o tagata e i ai a'afiaga tumau i le mauaina, uia ma le fa'aaogaina o auaunaga fa'a-tekonolosi o lo'o avanoa mo tagata lautele;
- Faia suiga talafeagai i Tulafono ma faiga fa'avae e pei o le fa'amaualaloina o tau e fa'atauina ai mea faigaluega fa'a-tekonolosi ina ia tu'uititia ai pavaeloto o lo'o taomia ai le mauaina e tagata e i ai a'afiaga tumau o le soifua o soo se auaunaga

O auaunaga / mea faigaluega fa'a-tekonolosi mo i latou e iai a'afiaga tumau, e aofia ai nofoa fa'ata'avalevale, mata-tioata, vae ma lima fa'apipii, to'oto'o, mea fa'alogo e o'o lava i polokalame fa'atekonolosi fa'apitoa e fai leo, ma mafai ona fa'amatalaina i le gagana faigofie ata ma tusitusiga.

O le tele o tagata e i ai a'afiaga tumau o le soifua, e silia ma le tasi le meafaigaluega fesoasoani latou te fa'aaogaina, ma e taua tele ai se auaunaga so'ofaatasi.

O le tatou mafutaga la i le aso leni, o se molimau ola lea i le tele o le sao o le Malo ma ana pa'aga e fa'ailoa ma fa'amautu ai le taua o faiga fa'atekonolosi i le soifuaga o i latou e iai a'afiaga tumau o le soifua. O se faitoto'a e mafai ai ona ofi atu i a'oa'oga, galuega, ta'alogo, tafaoaga ma vaega uma o aso fai so'o e pei o le mafai ona tausia o ia lava, gaosia o taumafa ma faitau tusi.

O isi matati'a ua ausia e le malo ma ana pa'aga e aofia ai le fa'amautinoa o le vave ona iloa a'afiaga o fanau logonoa. Fa'atino polokalame fa'alauiloa ma tu'uina atu l auaunaga talafeagai pei o mea fa'alogo ma le gagana fa'ataga e fesoasoani ai le atina'e o a latou feso'otaiga.

- Fa'atuina o le vaega mo le mauaina o nofoa fa'ata'avalevale, (MDS) i lalo o le fa'amalumaluga a le Matagaluega o Soifua Maloloina, ina ia fa'aititia ni tupe fa'aalu ona o ni a'afiaga po'o ni fa'aletonu e ono tula'i mai i le fa'aaogaina o meafaigaluega fesoasoani, latou te mana'omia ae le talafeagai ma i latou.

- Mauaina o se'evae fa'apitoa mo i latou e a'afia vae / aao, ina ia puipuia ai le o'o atu i a'afiaga ogaoga pei o le tipi o se vae / aao (tulou) ma isi a'afiaga aemaise lava i latou ua i ai a'afiaga tumau ona o gasegase le pipisi e pei o le suka.
- Fa'atupulaia le auai o sui auai o le Nuanua o le Alofa ma ana pa'aga i le atina'e o Tulafono ma ta'iala e feso'otai ma vaega uma e pei ona taua.

Ae peita'i, e le mafai ona tatou 'alo mai le tele o pa puipui ma lu'itau o lo o faava'atu'ia ai le mauaina e tupulaga talavou o agava'a e uia ai ma fa'aaogaina tekonoosi faa-neionapo. Pei o le lē gafatia o tau, le lava le malamalama i auunaga ma auala e agava'a ai. Utiuti avanoa mo iloiloga (assessments) ina ia mautinoa ai le mea faigaluega talafeagai mo tagata ta'ito'atasi aemaise lava i lona si'omaga.

O tulaga uma ia, ou te talitonu ai, o talanoaga ma folasaga o le a faia i leni lua aso, o se auala lea e mafai ai ona fa'asoa, a'oa'oina, ma fausia ai so'otaga i tulaga e mafai ai ona fa'aleleia le maua e tagata e i ai a'afiaga tumau o le soifua i Samoa, ma so'o se tafa o le lalolagi o feso'otaiga fa'atekonosi, ina ia iloga le maualuga o lo latou fa'aaofiaina atoatoa i so'o se atinae.

O le mea sili ona taua, ia aloa'ia, amana'ia ma mautinoa le ogatotonugalemu o i latou e i ai a'afiaga tumau ma a latou fa'alapotopotoga i le fuafuaina, fa'atinoga ma le iloiloga o taunu'uga mo'omia o atina'e uma.

Fa'ata'i ai lea o se fa'amatalaga, a tatala le fili-ali'i ma tatou ta'ape i leni taeao, le mamalu ma le paia ua aofaga potopoto, ia agalelei le Atua, foa'i pea le soifua manuia i le susuga i le Ta'ita'i o le sauniga, aua le fa'afale lemalu ai i totonu o ekalesia o lo'o tauasuina ai le ipuvai o le ola, aua se manuia mo a taeao o tagatanuu Samoa, aemaise ona tupulaga lalovaoa. Ia malu puipuia fo'i ma lavea'i le soifua ma le ola o nai alo ma fanau, ua mafai ona fa'atasi mai i leni fonotaga taua. Ia manuia foi le mamalu o le auvala'aulia, le susuga i le Tama'ita'i Pule o le Nuanua o le Alofa ma le mamalu o le afaigaluega, manuia Samoa atoa, ae ola lo'u nei tagata.

Soifua ma ia manuia !!